

來源: 蘋果日報

日期: 2012年02月03日

## 零件粗糙 專家測機指隨時爆炸

### 山寨 Galaxy S2 灣仔公開賣

【本報訊】內地山寨版 iPhone 時有聽聞，iPhone 宿敵三星的機王 Galaxy S2 也被看中複製成「山寨機王」，在灣仔旺區公然開舖出售，更有多款熱門智能手機的「仿製版」任君選擇，價錢比正版平一半。「機王」除功能多，可上網及下載免費 apps，還以免費收看本地收費電視台作賣點。惟有電子工程師拆機發現機組零件甚為粗糙，坦言擔心品質欠佳有爆機可能。海關則指會跟進此店疑出售冒牌手機。



Galaxy S2 (左) 的流暢度比 HDC SII (右) 高很多。

#### 免費裝 Apps 任睇收費台



領航電訊在灣仔道明目張膽售賣山寨機，機款五花八門。

深水埗鴨寮街一向有山寨手機出售，近月一間專賣山寨機的店舖「領航電訊」竟殺入行人如鯽的灣仔道，出售的過百款手機中，多部外形似足大品牌手機，價錢卻平一大截，當中有疑似老翻的牌子 SunSamy、Sung Ericsson 等，驟眼看以為是正版大劈價。

鎮店機王 HDC SII 屬智能手機，機身及包裝與三星 Galaxy S2 極為相似，擁雙核心、3G 及 wifi 上網，行 Android 2.3.4 版本，配備 500 萬像素鏡頭、語音輸入系統等，只售 2,399 元，與 Galaxy S2 機價約 4,700 元相比平一半，只是機身較厚及重。店員以此機可免費看收費電視作重點推銷，「呢部機最快最靚，幫你裝番個內地人搞嘅『安智市場』，全部 Apps 免費任裝。呢個『達龍影音』 Apps，百幾個電視台任你睇」，店員即用手機播放證明所言非虛，畫面顯示有線電影第三台，正播放港產片。

本報購買了一部 HDC SII 交香港專業教育學院電子及資訊工程系系主任趙炳權博士拆機，發現錫手工較粗糙，零件批號又用手寫，很有「山寨 feel」。趙博士表示，機體組裝技術尚算不俗，「做得好似同好足，但質素好難保證，真係攞嚟用，打打下電話唔知佢幾時跪低」。

### 軟件流暢與正版無得比



趙炳權博士指山寨機質素成疑，用家須承受一定風險。

縱然外觀與 Galaxy S2 極為相似，惟趙博士指出，用料可差之千里，「啱家啲零件精細，好難睇出有乜危險，但電子零件係一分價錢一分貨，啲料差啲價錢咪平啲」。至於可收看免費電視，趙博士指其實技術上「非常容易」，「只要啲部手機加少少硬件，再下載個 apps，就可以透過網絡同 apps 睇到電視」。

手機大王謝利則以軟件程式測試，結果顯示無論處理 2D 及 3D 畫面的流暢度，均與 Galaxy S2 「無得比」，唯一可取是「輕觸式屏幕夠大，色彩仲好過三星」。他提醒內地不少山寨廠為減低成本忽略品質，未為手機安裝斷電裝置，手機容易過熱甚至爆炸，「製作嚴謹嘅手機要經過多重測試，譬如用料有冇毒素、零件同機殼嘅耐熱程度同受撞力等」，他認為同等價格可購買大品牌。🍎